

## Voorwaartsch

Wear of gen wear  
weej speule vanoavend wir in Near, ho, ho, ho  
zo duk gewest  
vroeger ware weej doar op os best, ho, ho, ho

boete bij di zaal  
in 't veurprogramma van Normaal, ho, ho, ho  
'n tent langs de maas  
mar geej zegd dat dat urges anders waas, ho, ho, ho

alle klier in de tas, en Marc di guft gas  
want oeit, ge wet nooit, mar vurleupig giet 't veurwaarts  
geef acht, voorwaartsch marsch, volle kracht

geej ropt nog dat  
vergeat meeje neet te misse als geeje gat, ho, ho, ho  
al 'n weak afgeteld  
zo gaar dat alles van de knoak afvelt, ho, ho, ho

alle klier in de tas en Marc di guft gas  
want oeit, ge wet nooit, mar vurleupig giet 't veurwaarts  
geef acht, voorwaartsch marsch, volle kracht

straks wir dor de nacht nar boete  
't is zo fijn knats nar de kloete  
en de tied di vluugt vurbeeje  
'n moeie toekomst achter meeje

muuje als 'n perd  
elke oaverwinning waas 't werd, ho, ho, ho  
heer onder mien hoar  
heer op zolder bin ik nog ni kloar, ho, ho, ho

alle klier in de tas en Marc di guft gas  
want oeit, ge wet nooit, mar vurleupig giet 't veurwaarts  
geef acht, voorwaartsch marsch, volle kracht

## Gekapseisd

Good gepresteerd, 't schip balanceerd al joare  
hoeg water of sturm d'r is niks wat dit beutje rakt  
ondanks de leaftied nog steeds gen groete bezwoare  
de plenk die zien sterk, de mal die is good gemak

pomp in de romp blijft rustig zien rundjes dreie  
good onderhalde leupt als 'n neimachien  
en als 't al krakt wuif ik dat weg; lat mar weie  
tot din iene rots onder de moaneschien

toen alles dor de ruimte vloog, de kajuit bewoog

't schip dat voor, net iets te lang door  
toen is 't gekapseisd

alles dat schoof, ik docht straks val ik van de aarde  
't water, 't schoem, ik hing stil in de oceaen  
teage 't dek laag ik in 't niks te stare  
de boet vol met beer, d'r waas gen halde mier aan

toen alles dor de ruimte vloog, de kajuit bewoog

't schip dat voor, net iets te lang door  
toen is 't gekapseisd  
have in zicht, 't vertrouwde licht  
toen is 't gekapseisd

in de verte zaag ik iemand zwaai  
ik dreef en vulde wat blood  
ik docht straks dan kome de haaie  
't ging al zo lang al zo good

't schip dat voor, net iets te lang door  
toen is 't gekapseisd  
have in zicht, 't vertrouwde licht  
toen is 't gekapseisd

## **Casa halleluja**

Limburgse zon velt oaver de meubels  
de weg nar hoes is 't moeiste van de reis  
tapijt wir op de vloer, als 'n geribbeld strand  
de favoriete stool, gitare bij de hand

ik zij os nog goan, busse vol toeriste  
we keke nar elkaar vanachter dubbel glaas  
ventilator stong te hard, we zate op de tocht  
we vulde os bejaard, toen heb ik meej bedocht

kiek neet nar de reagen mar kiek nar d'n boag  
dan drieve de wolke vanzelf wir hiel troag  
steeds verder weg dan veranderd de daag  
in de moeiste kleure dan wapperd de vlaag, halleluja

koffer dat leet nog achter in de auto  
mien eige kamer het op meej gewacht  
ik denk terug an dat hotel met oetzicht op de moor  
heer boete druupt de tuin in 't blauwe oor

kiek neet nar de reagen mar kiek nar d'n boag  
dan drieve de wolke vanzelf wir hiel troag  
steeds verder weg, dan veranderd de daag  
in de moeiste kleure dan wapperd de vlaag, halleluja

wind in de schouw want hiel gauw  
is de herfst wir in 't land, oranje broen  
en doarnoa woent de winter heer gewoen  
tot de ierste zwaluw wir giet lande, met losse hande

halleluja, de twedde boag di keumt d'r a  
hoeg in de lucht, halleluja

kiek neet nar de reagen mar kiek nar d'n boag  
dan drieve de wolke vanzelf wir hiel troag  
steeds verder weg, dan veranderd de daag  
in de moeiste kleure dan wapperd de vlaag

van paars en geal, nar roei, ach wat is dat moei  
en op 't end stiet enne hiele groete

pot met goud, hieperdepiephoera  
ik huur heer in hoes allien mar halleluja

## Zigeunerin

Ik leg mienne telefoon  
vur vandaag gewoen wir an de kant  
ik heb 'm neet mier nuudig heer  
geej bint d'r wir, eindelijk want  
geej steurde meej 'n bericht  
en alles is wir good  
de letters danse in 't licht  
en ik denk an ow

't is wat ik al langer wet  
't leave het totaal gen zin  
't is gedoan heer met de pret  
zonder mien zigeunerin  
mien zigeunerin, mien zigeunerin

geej bint enne Robin hood  
ow dade di zien groet, ow hart is klein  
geej kiekt nar dat hundje doar  
in 'n triestig spoar oaver 't plein  
't zukt nar eate op de vloer  
ni geboare vur geluk  
geej breakt ow bruedje middedoor  
en heej kriegd 'n stuk

en ze hult neet van hiele drukke  
of van minse met krom zin  
of die van erme stumpers plukke  
gat mar urgens anders hin  
mien zigeunerin, mien zigeunerin

raar hoe ik d'r an wen  
filet american op krentebroed  
en dat ik ierst in actie koom  
pas als 't is gedoan leg ik 't oet  
en dat ik in de reagen dans  
ni wacht op beater wear  
blie met mienne twedde hands

gekocht bij Lommen Bear

't is wat ik al langer wet  
't leave het totaal gen zin  
't is gedoan heer met de pret  
zonder mien zigeunerin  
mien zigeunerin, mien zigeunerin

### **Elke ierste kier**

Ik zaag de wiele dreie, de motor di ging rond  
ik zaat heer al joare genageld aan de grond  
kwaam amper nog vurroet, 't lukte mee' ni mier  
als elke ierste kier

ik bleef mien rundje make achter 'n gesloate hek  
de engst wist mee' te rake steeds op dezelfde plek  
wist mee' altijd doar te breake op dezelfde manier  
als elke ierste kier

en nou ik wir stoj en met andere oege kiek  
nou ik wir goj, twiejje stappe tegeliek

te lang weggedoake mee'zelf klein gemakt  
heerbinne ging 't spoeke op dezelfde plats gerakt  
op dezelfde plats gebroake als elke eerste kier  
heer break ik ni mier

en nou ik wir stoj en met andere oege kiek  
nou ik wir goj, twiejje stappe tegeliek

't het mee' heer gebrocht, vur 't ierst dat ik 't merk  
heer grujde de kracht, heer woord ik extra sterk  
op deze zwake plek als elke ierste kier  
heer break ik ni mier

en nou ik wir stoj en met andere oege kiek  
nou ik wir goj, twiejje stappe tegeliek

ik veul de wiele dreie, de motor di giet rond  
ik koom na al die joare wir los heer van de grond  
heer loat ik mien gedachten, heer loat ik mien alt zeer  
heer op deze plek, vur de latste kier, ik break ni mier

## Leidingwater

Heer onder de groete sloete  
miestal zoe rond eind mei  
kome ze massaal nar boete  
blozend als de ierste aarbei  
en dan goan ze zinge  
oaver nou en oaver later  
miestal oaver liefdesdinge  
't zit heer in 't leidingwater

inens dan huurde Beyonce  
makt sinds lang wir enne ronde  
heupwiegend keumt ze vurbeej  
kiek nou toch die donkerblonde  
liekt precies Kylie Minoque  
straks als heer de wind giet weije  
tipje van de zomerrok  
kiek die kuite, kiek die dije

ohoh, 't zit heer in 't leidingwater

booredochters superstrak  
doar zit alles op en aan  
framboezeroeie nagellak  
ik denk woar het zeej 't vaan  
neet van moeder of van vader  
gen schoel die doar vur is  
't zit heer in 't leidingwater  
groete slokke, lekker fris

ohoh, 't zit heer in 't leidingwater

drie gebroake harte terug  
kermis in America  
leep ik heer oaver de brug  
kiek nou toch doar zitte ze  
in 't licht als 'n theater  
vrouwe zien heer ens zo schon  
't stroemd dor 't leidingwater  
ze drinke heer vloeibare zon

oh wow, 't zit heer in 't leidingwater

## **Middag in mei**

In deze kroeg net boete de stad  
als ik heer nog langer blief  
mis ik de trein mar wie deud meej wat

want de treine die rijje nog wal dukker vandaag  
ik zit heer zo tevrijje ik veul de tied din vertraagd

als enne koning op mienne troen  
de krakende plenk, alles als toen  
ik smelt alles um nar hoe 't oeit waas  
't zand dat wuud glaas

alles is nog verloate en iederien droemt  
'n paar minse die proate  
't verlange dat stroemt  
ik veul de vrede van mien jeugd  
zo lang op dit moment verheugd  
de koffie en de krant, mien vaderland

oeit zaag ik de werlt vanachter dit raam  
vroog ik meej af woar alles bleef  
zaat ik te wachte op wat d'r kwaam

mar vandaag is 't anders, d'r is niks wat ik mis  
want d'r is iets veranderd, dit is wat het is

dichter als oeit bin ik bij mien doel

mar zonder de zurg, de hiele boel  
ik zet mien gedachte vandaag effe stil  
dit is wat ik wil

alles is nog verloate en iederien droemt  
'n paar minse die proate  
't verlange dat stroemt  
ik veul de vrede van mien jeugd  
zo lang op dit moment verheugd  
de koffie en de krant, mien vaderland

en ik loep gelouterd de weg nar 't station  
op enne middag in mei, toen dit liedje begon

### **Mien eige manier**

Jong, jong, wat ware we jong  
wat waas ik verliefd toen ik ow vong  
gitaarversterker, 't nijste model  
di kunde geej baas dat zei di kel

metien gekocht, mar tot mienne schrik  
thoes opgebouwd waas grutter als ik

't volume op elf  
ik kos d'r allien mar hiel hard op scheure  
ik zei teage meejzelf  
weej kome same neet dor ien deur

en toen alles in de midde  
toen, vur de ierste kier  
'n stem deep in meej zei zidde  
geej bint 't moeist in ow eige klier

vur de speegel 't blinkende blauw  
dat stiet ow hiel good dat zei die vrouw  
geblumde blouse met aloha Hawaii  
waas 't latste met kleur dat ik oeit haj



d'r ging enne knop um  
ik leep nar de kast tied vur 'n nij begin  
mien hiele spectrum  
van gries nar zwart en alles doar tusse in

alles ging beweage  
toen, vur de ierste kier  
alsof, ik iemand huurde zegge  
geej bint 't moeist in ow eige klier

nar enne valse start  
kwaam ik thoes bij mien hoempa hart  
vanaf din daag niks anders mier  
'n mins is 't moeist in zien eige klier

en toen, elke daag gezonge  
gespeuld op mien eige manier  
Ik haj mien eigen stem gevonge  
die zei; ge bint 't moeist in ow eige klier  
alles in de mitte  
toen vur de ierste kier  
'n stem deep in meej zei zidde  
geej bint 't moeist in ow eige klier

## **Gisteroavend**

Gisteroavend in mien bed  
mien liedje dat waas kloar  
't waas ienne groete binnepret  
op 't einde van 't joar  
mar toen begon d'r iets te knage  
din titel din is fout  
't waas has ni te verdrage  
Ik haj 't versouwd

mien gedachte make af en toe  
ruzie met elkaar  
dan goan ze same op de voest  
ik denk altied lat ze mar  
Ik wet gedachte doon dat wal 's  
zien soms zwoar op de hand  
gisteroavend toen reep alles  
heer binne moord en brand

't ging oaver dit en oaver dat  
elkaar wat opgestoekt  
die melodie haj ik gejat  
die zin zo duk gebroekt  
en altied wir dat C akkoord  
dat klonk opntiegelijk vals  
ze vele oaver elk woord  
en wurrum wir enne wals

mien gedachte make af en toe  
ruzie met elkaar  
dan goan ze same op de voest  
ik denk altied lat ze mar  
Ik wet gedachte doon dat wal 's  
zien soms zwoar op de hand  
mar gisteroavend toen reep alles  
heer binne moord en brand

gisteroavend midde in de nacht  
toen heb ik ze 't zwiege opgelagd  
ik bin vur de muziek goan stoan  
en reep van nou is 't gedoan

ik heb mien zigeunerin gekust  
en alles woord wir licht  
de binnebrand di waas geblust  
mien oege vele dicht

### **Drei alles um**

Soms dan zudde wille dat 't woar waas  
't antwoord op de bojjem van 'n beerglaas

elke daag, nar 't cafe  
nachtelang, doorgegoan  
same op zeuk nar 't idee  
de groete vroag van 't bestoan

en iederien is specialist  
alles wurd grondig, veurbereid  
hebbe nog noeit 'n boei gemist  
elke stien wurd umgedreid

soms dan zudde wille dat 't woar waas  
't antwoord op de bojjem van 'n beerglaas

en altied door met man en macht  
tot 's merges vroeg, koste wat kost  
toen inens hiel onverwacht  
't mysterie opgelost

net toen iederien d'r gans dorhin zaat  
dreef 't antwoord op d'n bojjem van 'n beervaas

heej leep nar 't podium  
en 't heelal dat bewoog  
de sleutel is drei alles um  
beer is 't antwoord, wat is de vroag

we vrooge doar en we vrooge heer, ja, ja, ja  
wat de vroag ok waas  
't antwoord dat is beer, ja, ja, ja

inens begon 't hiel zachtjes te weije  
't ganse universum dat ging dreie  
d'r kwaam 'n splinternij verhaal nar binne  
toen koste we van vur af aan beginne

ik wet nog precies hoe weej heer zate  
elke barkruk kende ozze naam  
we dronke elke daag als de pirate  
toen inens 't licht nar binne kwaam

als ge onder op de bojjem bint dan wette  
dat ge ow doar vur 't ierst wir af kunt zette  
dan kunde d'r ow eige fiest van make  
drei mar alles um en lat 't smake

### **Vastenoavend is vurbeej**

Ik lig in bed met ien oeg oape  
en ik oaverzij de zaak  
ik kan ni sloape, d'r is 'n rijje dat ik waak

't ruukt heer neet allien nar roeze  
ik strompel nar de douche  
'n lederhose, enne fel geblokte blouse

boete loepe 'n paar late

en alles vult heer vroeg  
d'r valle gate, mien kamer is 'n kroeg

mien bed is enne asbak  
en alles slingerd rond  
als ik wat vastpak  
velt iets anders op de grond

de telefoon plekt vast an mien vingers  
en ik zij, vastenoavend is vurbeej

en ik staar nar 't plafond  
nar hoe weeje same ginge  
't cafe dat waas wir schon  
vastenoavend posters hinge

ik lig in bed met ien oeg oape  
en ik oaverzij de zaak  
ik kan ni sloape, d'r is 'n rijje dat ik waak

't ruukt heer neet allien nar roeze  
ik strompel nar de douche  
'n lederhose, enne fel geblokte blouse

en ik wrief wat water dor mien oege  
en ik zij, vastenoavend is vurbeej

ik staar nar 't plafond  
nar hoe weeje same ginge  
't cafe dat waas wir schon  
vastenoavend posters hinge

en ik droem als de sterre doarboave stroale  
neet vur meeje, vastenoavend is vurbeej

en ik staar nar 't plafond  
ik kiek nar hoe weeje ginge  
't cafe dat waas wir schon  
vastenoavend posters hinge  
in de allerierste zon en alle minse zage  
os dor de optocht goan, boave op de wage

## **Moaneschien**

Stien vur stien, vandaag stapel ik keier op elkaar  
steeds 'n paar, en langzaam grujd d'r enne flinke hoep  
en Ik loep, en onderweg dan kiek ik um meej hin

zoedat ik wet en neet vergeat, hoe ver ik nou al bin

stap vur stap, alles wat ik mei nar boave neem  
gen probleem, giet in enne kopere keatel en ik wacht  
elke nacht, goei ik alles wat ik nuudig heb bijien  
reur ik good dor elkaar en dan maak ik moaneschien

dan zit ik doar hoeg, moaneschien, mar zeker neet druug  
dan zit ik blie te zien, als de zon is gezakt  
stien vur stien, elke nacht maak ik moaneschien

schep vur schep, en dan de tied zien werk loate door  
hiel gewoen loate pruttelen net als de vurrige kier  
mog iets mier, toeters en belle, vlinders, vioele good dorien  
en dan ruuk ik de geur van verse moaneschien

dan zit ik doar hoeg, moaneschien, mar zeker neet druug  
dan zit ik blie te zien, als de zon is gezakt  
stien vur stien, elke nacht maak ik moaneschien

helling op en helling af, de ganse daag, umhoeg en wir umlieg  
ienmoal boave zakt 't stof, val ik neer met enne plof  
in wolke gehuld en met hiel veul geduld

stroal vur stroal, neem ik mei in enne broen papeere zak  
hiel strak, halt 'm dicht teage meej aan en dan hiel gauw  
vur daag en dauw nar 'n donkere plek heer onder in 't bos  
loat ik de moaneschien los, giet alles stroale

en merge wir opnij, dan zit ik doar hoeg, moaneschien  
mar zeker neet druug, dan zit ik blie te zien  
als de zon is gezakt, stien vur stien, oaver nou en oaver straks  
donker en licht, 't zit hiel dicht bijien, 's oavends in de moaneschien

## **Niks zonder ow**

Tusse de winter en de lente

kome altied die momente  
dat alles anders wuurd

ge ruukt inens wir 't zand en 't water  
scheup loepe mei, endegsnater  
de blauwe lucht wir in de buurt  
ierste kieviet al gehuurd

ik loep verder oaver 't zandpaad  
in de stal speult de radio  
't lied van toen ik d'r dorhin zaat  
echt, 't is niks zonder ow

oaveraal, koom ik ow teage  
als ik heer loep op gods weag en  
woar de beak zich langzaam dreid

tot op 't end ow koers gevare  
altied bescheide gen groete gebare  
nou de lentewind wir weid  
van de nijje werkelijkheid

ik loep verder oaver 't zandpaad  
in de stal speult de radio  
't lied van toen ik d'r dorhin zaat  
echt, 't is niks zonder ow

't is niks zonder ow, we doon mar wat  
ik wet zonne gojje hebbe weej nog neet gehad  
we doon mar wat, ik wet zonne gojje  
hebbe weej nog neet gehad

echt, 't is niks zonder ow  
zonne gojje hebbe weej nog neet gehad

